

RABU 7 SEPTEMBER 2016

KONVOKESYEN PSP 2016



MOHAMAD SYAFIQ MOHD. RAFI (tiga dari kanan) dan S. M. Prabbananthen (tiga dari kiri) bersama trofi Anugerah Kecemerlangan Akademik dan Kokurikulum yang diterima dalam Konvokesyen Politeknik Seberang Perai Ke-16 di Permatang Pauh, Pulau Pinang, baru-baru ini.

Kemiskinan keluarga bukan halangan untuk berjaya

PERMATANG PAUH 6 Sept. - Dua Penerima Anugerah Kecemerlangan Akademik dan Kokurikulum Peringkat Politeknik Seberang Perai (PSP) sempena Majlis Konvokesyen Ke-16 tidak pernah menjadikan kemiskinan sebagai alasan untuk gagal dalam pelajaran.

Kata mereka, apa yang lebih penting ialah berusaha tanpa jemu sejajar dengan azam memajukan diri dan keluarga tanpa memikirkan kekurangan diri.

S. M. Prabbananthen, 20, penerima Anugerah Kecemerlangan Akademik dan Kokurikulum sesi Jun 2015 berkata, sebagai anak pemandu lori dan ibunya bekerja sebagai tukang jahit, dia terpaksa belajar dalam keadaan serba kekurangan.

"Kehidupan kami sekeluarga tidak semewah rakan lain yang ibu bapa mereka berpendapatan tetap terutama dari segi kewangan.

"Malah saya sebagai anak bongsu terpaksa membuat pili-

han mengutamakan perbelanjaan keluarga daripada memikirkan memenuhi keperluan saya sebagai pelajar selama ini," katanya kepada *Utusan Malaysia* di sini baru-baru ini.

Prabbananthen merupakan salah seorang daripada 1,133 penuntut PSP yang menerima diploma masing-masing dalam majlis konvokesyen PSP itu yang disempurnakan Penasihat Khas Perdana Menteri Bagi Wilayah Ekonomi Koridor Utara (NCER), Datuk Seri Zainal Abidin Osman.

Menurut Prabbananthen, disebabkan tidak dapat memenuhi keinginan diri dalam banyak perkara, dia menanam azam menjadi pelajar berjaya supaya masa depannya lebih terjamin.

"Saya menumpukan perhatian semasa berada dalam kelas untuk menjadikan masa senggang untuk mengulang kaji pelajaran sehingga digelar ulat buku oleh

rakan dan keluarga," katanya.

Menurutnya, usaha itu berbaloi selepas dia kini menyambung pelajaran di Universiti Malaya dalam bidang Sains Komputer Kejuruteraan Perisian.

Sementara itu, Mohamad Syafiq Mohd. Rafi, 21, yang memenangi anugerah sama bagi sesi Disember 2015 berkata, dia menjadikan kepayahan bapanya yang mengusahakan perniagaan kecil-kecilan sebagai sumber inspirasi untuk berjaya.

"Keadaan ini membuatkan saya lebih cermat berbelanja wang saku sepanjang pengajian," katanya.

Mohamad Syafiq yang bercita-cita menjadi jurutera berkata, dia juga terpaksa bekerja sambil sebagai juruteknik di sebuah kilang berhampiran rumahnya di Bukit Tengah dekat sini, dalam usaha mengumpul duit melanjutkan pelajaran ke peringkat lebih tinggi. *Utusan Malaysia*